



UNIVERSITÄT  
TARTU  
BIBLIOTHEK

585797-  
- 585808

Mag. St. Dr.

I





Christiani Kisiu ao gy. d. 25 Junii

81V  
21



Thew  
6242

Sum. 1886. 3. 1886.  
ad 1886. 3. 1886.



vide Dreier, Diff. & Pontificatus de hac ma<sup>a</sup> a<sup>o</sup>, 679. editam p. 831.



vid. & hac man. Diss. Dreieri. j. l. m. h. p. pag. 293. — 348. —

DISPUTATIO THEOLOGICA

De

PRIMATU  
ROMANIPON-  
TIFICIS

Quam

Deo annuente

Consensu Venerand. Facult. Theol.

PRÆSIDE

CHRISTIANO DREIERO

Pomer. S. Theol. D. & Profes. P.

ventilandam publicè

exponit

JOHANNES Hörnick

Plavia-Variscus

Ad diem 9. Junij

In Auditorio Majori  
horis antemeridianis.

---

REGIOMONTI

Typis JOHANNIS REUSNERI

ANNO 1645



VIRIS  
GENERE, VIRTUTE AC ERUDITIONE  
NOBILIBVS atq; SPECTATISSIMIS  
DN. FRIDERICO  
DN. REINHOLDO } a Müllhen.

Patritijs Reip. Cniphovianæ primarijs;

ut &

*Humanissimis, Doctissimis atq; integerrimis*  
DN. DANIELI RABPOLDO  
Notario Senatus Heilgenbelensis  
fidelissimos;

DN BALTHASARI Fischern/  
Aromatario ac Mercatori Palæo-  
poleos præcipuo.

*Mecænatibus, Fautoribus ac Patronis suis magnis,  
multisq; nominibus de venerandis, colendis, cum  
in grati animi ob exhibita beneficia contestatio-  
nem, tûm in ulteriorem sui commendationem,  
hoc exercitium Theologicum consecrat*

585498  
JOHANNES HORNICK. R.



## Thesis I.

**R**omanam Ecclesiam semper magni aestimatum fuisse, in historiis reperimus, tum quod esset in sede Imperiali, Roma; tum quod ad Imperatorem eo in loco residentem proximum haberet accessum, & laborantibus alibi Ecclesiis facile auxilium impetrare posset; tum denique, quod à maximis Apostolis Petro & Paulo fundata esset, quorum labor quamdiu in suo fructu perseveravit, & fidei doctrinam & Ecclesiasticam disciplinam egregie excelluit: Qua de causa & factum, ut ex ea longè major numerus Ecclesiarum excreverit, quam ex ulla alia sede Apostolica, idque partim Apostolis adhuc viventibus, partim post illorum tempora. Ecclesia dignitas & Episcopo quandam dignitatem conciliavit, ut præ cæteris eximio in honore ab omnibus haberetur, postquam tum consuetudo, tum statuta conciliorum obtinuerunt, ut autoritas Episcoporum à sedibus aestimaretur, & Episcopi cederent Metropolitanis, Metropolitanis Primati seu Patriarchæ, Patriarchæ etiã ei, qui in sublimiori sede constitutus erat.

II. Hinc cum antiquitus quivis Episcopus alios errantes, etiã extra suam Ecclesiam, corrigere posset, hoc maximè Episcopo Romano ob sedis eminentiam convenire putabant, ut errantes alibi Episcopos moneret & in viam reduceret, sacrorum Canonum custos & vindex existeret, commune asyllum & refugium afflictis atque illegitimè condemnatis præberet; unde nec facile cæteri Patriarchæ aliquid decernebant, nisi & illum tanquam præcipuum in orbe Metropolitanam consulissent: Siqua difficultas in religione movebatur & schismata gliscebant, tutissimum existimabant cum Romano Patriarcha communicare, eidemque veluti nodo Ecclesiarum præcipuo adhærescere, ne facile à Catholica Ecclesia communione divellerentur.

III. Ceterum hæc privilegia humanam auctoritatem sibi concessa tandem in absolutum dominatum & Monarchiam Ecclesiæ visibilem,



bilem, non jure humano, sed divino superstructam conver-  
tit, venditans se Christi & Dei interris vicarium, Petri suc-  
cessorem totiusq; Ecclesie Christi Monarcham supremum, plenissi-  
ma potestate regendi Ecclesiam à Christo instructum. Hac po-  
testas in eo consistit, quòd ille habeat auctoritatem de rebus fidei  
determinandi & definiendi infallibiliter, & sit supremus omni-  
um controversiarum iudex, quod ipse solus possit leges ferre obli-  
gantes in conscientia, & solvere à quacumq; obligatione, dispensa-  
re contra jus divinum, solvere vota & juramenta & matrimo-  
nia, juxta illud Innocentij III. C. Proposuit. de Concess. Præb. Se-  
cundum plenitudinem potestatis de jure possumus su-  
pra jus dispensare.

IV. Hinc quia caput Ecclesie est, ut putat, delegata potestate  
à Christo instructus, non solum singulis Episcopis, sed & omnibus  
congregatis totaq; Ecclesia universali vult esse superior, & Concili-  
orum indicendorum, transferendorum ac dissolvendorum ple-  
num jus & potestatem se habere existimat, ut loquitur Leo X. in  
Concilio Lateranensi Sess. II. Ideò omnem potestatem Episcoporu  
à se solo suspendit, eamq; pro suo arbitrio dat & revocat, extendit  
& restringit: Hinc reservare ipsi certos casus coguntur, de quibus  
ipse solus judicet. Porro ex eadem potestatis plenitudine potest  
indulgentias dare quibusvis peccantibus easdemq; applicare ani-  
mabus in Purgatorio infernales pœnas perpetientibus. Quintan-  
dem quia Monarcha Catholica Ecclesie audire vult, hinc sibi  
vendicat supremam quoq; in temporalibus potestatem, ut possit  
Imperatores, reges & principes dignitate ac potentia exuere &  
subditos eorum à jurato obsequio absolvere. Deniq; ex his dedu-  
cunt, quòd subesse Romano Pontifici prorsus sit de necessitate salu-  
tis, sicut definit Bonifacius VIII. cap. Unam sanctam. Extrava-  
gante de Majoritate & Obedient. Subesse Romano Pontifi-  
ci omni humanæ creaturæ declaramus, dicimus, defini-  
mus & pronunciamus esse de necessitate salutis.



V. Caterum tot sunt Romana Ecclesie privilegia, quæ vi-  
 bus primatus jactitant, ut vix omnia enumerare valeamus. Ple-  
 rag. Gregorius VII. ex Seculo XI. in suis, quos vocat, Dictatibus  
 complexus est lib. 2. post Epist. 55. Nec alij diversum ab ipso senti-  
 unt, qui cum Pontifice faciunt, præsertim moderni Iesuitæ. Pari-  
 siensis tamē Academia Doctores moderationē quandam adhibue-  
 runt: Christum enim supremam quidem potestatem in Ecclesia  
 instituisse dicunt, sed eam esse in Ecclesia primariō, secundariō in  
 Papa, utrumq; tamen jure divino, & in Ecclesia esse majorem,  
 quam in Papa, imō Papa potestatem minorem esse potestate Eccle-  
 siae, & proinde Ecclesiam universalem & Concilia eam represen-  
 tantia esse supra Papam, qui, tametsi sit supra singulos Episcopos,  
 non tamen super universos. Ideō porro dicunt, Papam correctioni  
 Conciliorum subiacere, eum posse errare & ab Ecclesia in viam  
 reduci. Quo nomine etiam viri docti Seculo XV. Concilium Ba-  
 siliense convocarunt, ut sedes papalis aliquando reformationem  
 subiret, quod tamen Eugenius IV. disturbavit suō Florentino con-  
 ciliabulo, in quo inter cætera & dogma de primatu Pontificis fuit  
 stabilitum. Definimus, inquit ibi Patres, sanctam Apo-  
 stolicam sedem & Romanum Pontificem in universum  
 orbem tenere primatum, & ipsum Pontificem Roma-  
 nū successorē esse beati Petri, principis Apostolorum,  
 & verum Christi vicarium, totiusq; Ecclesiae caput &  
 omnium Christianorum patrem & doctorem existere,  
 & ipsi in beato Petro pascendi, regendi & gubernandi  
 universalem Ecclesiam à Domino nostro Iesu Christo  
 plenam potestātē traditā esse, quemadmodum etiā in  
 gestis. Oecumenicorum Conciliorum, & in sacris Ca-  
 nonibus continetur, ut habent litera unionis cum Græcis in  
 fine Concilij. Tom. 4.

VI. Initio quidem nullum dubium esse potest, quin Christus  
 post ascensionem suam in cælos adhuc sit caput Ecclesiae suae:



quod quidem munus ita obit, ut quantum ad externa, non nisi ministris indigeat: omnia enim ipsi soli tanquam unico capiti adscribuntur, cæteri quicum hoc capite copulantur, vel membra tantum dicuntur, vel in regimine ministri. Rom. 12. v. 15. Multi unum corpus sumus in Christo, singuli autē alter alterius membra. Nullum hīc aliud caput agnoscit Apostolus, nisi Christum, qui præter Christum sunt eos membra vocat, non minus Petrum quā alios Apostolos & fideles cæteros includens. Quin quod majus est, hanc ipsam rationem capitis, & hoc regimen in Ecclesiam demum Christus perfectē accepit post ascensionem suam in cælos postquam Pater ipsum constituit ad dexteram suam in coelestibus, supra omnem principatum & potestatem & virtutem & dominationem & omne nomen, quod nominatur non solum in hoc seculo, sed etiam in futuro; & omnia subjecit sub pedibus ejus, & ipsum dedit caput super omnem Ecclesiam, quæ est corpus ipsius, & plenitudo ejus, qui omnia in omnibus adimplet. Eph. 1. v. 20. & seqq. En quomodo ea ipsa causa, quam allegant adversarij, constituendi vicarium caput, illud prorsus excludat. Eo ipso enim quod ascendat in cælos & consedit ad dexteram Dei, plenē caput Ecclesiæ factus est, idq; non solum in futuro, sed & in hoc seculo super Ecclesiam in terris adhuc militantem. Jam ne quidem in mundana republ. tunc vicario opus est, quando primū princeps est constitutus, & potissimum munus suum exequitur.

VII. Quod Christus post ascensionem suam adhuc gubernet Ecclesiam, sæpius meminit scriptura sed vicarij capitis non meminit: Ipse enim est Caput corporis Ecclesiæ qui est principium, primogenitus ex mortuis ut sit in omnibus ipse primatum tenens Col. 1. v. 18. & sic omnia per eum obeuntur in Ecclesia sine præsentia visibili: spiritualia enim sunt quæ in Ecclesia aguntur, & ex quibus constat. Per ipsum Deus omnia



omnia reconciliat in ipsum, pacificans per sanguinem crucis ipsius sive quæ in terris, sive quæ in cœlis sunt. v. 20. Ipse per Spiritum distribuit varia dona, quibusdam sapientiam, quibusdam scientiam, quibusdam fidem, alijs gratiam sanandi infirmos, aliis prophetiam, quibusdam genera linguarum; quæ tamen diversa membra tam differentibus donis instructa, non aliunde unitatem habent, quam à Christo: sicut enim corpus unum est & membra habet multa; omnia autem membra corporis, cum sint multa, unum tamen corpus sunt, ita & Christus se habet cum Ecclesia sua. 1. Cor. 12. v. 12. Ideo Christus, tanquam caput, Ecclesie suæ dat unitatem, & utitur quidem variis membris, sed non alio capite.

VIII. Idem patet ex perpetuo Christi sacerdotio, quod describitur Heb. 7. v. 17. & seqq. Ponit enim autor Epistola discrimen inter sacerdotium Christi & sacerdotium Leviticum: quod hoc morte interruptum fuerit, illud verò æternum maneat. & alij quidem plures, ait v. 23. facti sunt sacerdotes idcirco, quod morte prohiberentur permanere; hic autem quod maneat in æternum, sempiternum habet sacerdotium, successorē alium Pontificem non admittit, nec vicariū indiget, quandoquidem ipse adhuc summi Pontificis munus obit. Sit ita non amplius eodem modo hoc fungatur officio, ut antè, inde non inferetur, simpliciter ipsi vicario opus esse, sed tantum quoad modum agendi fortè illum non repugnare.

IX. Degens adhuc in terris Dominus informabat, arguebat, consolabatur, errantes corripbat summâ divinâ autoritate & virtute: In his vicarium substituit non hominem, sed spiritum S. qui Christi vices eâ ratione, quâ officio in terris ex autoritateungebatur, sustinuit & adhuc sustinet. Expedit vobis, inquit, ut ego vadam: si enim non abiero, Paracletus non venit ad vos; si autem abiero mittam eum ad vos. Joh. 16. v. 7. cap. 14. v. 18. 26. Non relinquam vos orphanos, Paracle-



racletus Spiritus, quem mittet Pater in nomine meo, ille vos docebit omnia. Igitur Spiritus S. vices Christi obijt in Ecclesia post ascensionem eius & adhuc obibit usq. ad finē mundi, adeoq. ut antē discipulos corā informabat & solabatur Christus, sic jam illas partes obit per Paracletum Ecclesia datum. Unde Tertullianus in lib. de præscriptionibus & de velandis virginibus, vicarium Domini appellat spiritum S. item, vicariam vim Spiritus S. Discipulos ut non nisi ad partes ministeriales vocavit; sic & ijs, non nisi easdem reliquit, scilicet testandi de doctrina, factis, vita & miraculis suis quæ corā viderant & audierant, sicut ait: Quum venerit Paracletus, quem ego mittam vobis à patre Spiritum veritatis, qui à Patre procedit, ille testimonium perhibebit de me. & vos testimonium perhibebitis, quia ab initio mecum estis Joh.

U. v. 26, 27.

X. Sic cum Apostoli in locum Jude Matthiam sufficerent, dicebant, oportere unum ex multitudine testem resurrectionis Christi fieri cum ceteris Apostolis. Act. 1. v. 22. ubi & apertè Apostolatus dicitur diaconia, quæ Mathia fuit demandata. v. 25. Item cum Diaconos constituerent, qui ministrarent mensis, ipsi sibi nihil aliud reservabant, quàm orationem & diaconiarum τὸ λόγος. Act. 6. v. 4. non potestatem condendi leges, instituenti tribunal, imperandi, puniendi, dominandi, quippe quæ Christo capiti Ecclesia competunt, Apostoli tantum ministerium obtinent. Sicut & Paulus dicit, Christum sibi dedisse διακονίαν τοῦ σώματος καὶ τοῦ αἵματος 2. Cor. 5. v. 18. Ministri igitur Ecclesia sunt, non domini. Quid est Apollo, inquit, quid Paulus? ministri sunt per quos credidistis. 1. Cor. 3. v. 5. mox Apostolos vocat συνεργοὶ θεοῦ, non aliter, quā quòd, sicut in agricultura, qui plantant aut rigant, Deo cooperentur, aut sicut structores ædium Ecclesiam super Christum unicum fundamentum erigant, quod salum camfulcit & sustentat. v. 11. Et hoc quidem generatim de omnibus



omnibus asserit, quando v. 22. ejusmodi reductionem facit: Sive Paulus, sive Apollo, sive Cephas, sive mundus sive vita, sive mors, sive presentia, sive futura, omnia vestra sunt: vos autem Christi, Christus autem Dei; qua gradatione semper ascendit ad superius: Nam supra Apostolos tanquam ministros Ecclesiam collocat supra Ecclesiam Christum, & supra Christum, ut hominem, Deum.

XI. Apparet igitur nihil aliud datum fuisse Apostolis, nisi parum ministeriū fidei & Evangelij Christi, ut sicut Christus in diebus carnis, obirent in mundo, predicarent & Sacramenta administrarent: Has enim operas ministeriales cum Christus in gloria constitutus non amplius exequatur, vicarios seu legatos constituit Apostolos; sicut Palus 2. Cor. 5. v. 20. Pro Christo, inquit, legatione fungimur tanquam Deo exhortante per nos. Et Eph. 6. v. 20. pro Evangelio se legatione fungi dicit, in catena. Jam notum est, legatum suum principalem, à quo missus est, representare & vices ipsius supplere. Misit Filium Pater exhortari, ait Chrysostomus Hom. 11. in 2. Cor. & legatione fungi apud humanum genus pro se; quoniam autem ille occisus abiit, nos legationem suscepimus & pro illo & Patre exhortamur vos.—Igitur pro Christo legatione fungimur, hoc est illius loco, nam nos quæ illius officij sunt suscepimus. En Apostolos omnes Christi vicarios in ministerio Evangelij, & omnes inter se aequales. Ad quid igitur sodes unum aliquem Christi vicarium Ecclesie Monarcham committimus? cum Christus adhuc sit Caput, Rex, Monarcha Ecclesie sue in actu, cum Paracletum vicarium habeat in ijs, quæ ex autoritate in terris obivit, in ministerialibus omnes Apostolos ex æquo vicarios & legatos constituerit

XII. Si respiciamus munus Apostolis demandatum, secundū singulas partes, in omnibus reperiemus pares. Ex æquo enim missi sunt & pariter cura Ecclesie ipsis commissa est. Joh. 20. v. 21.



Sicut misit me Pater, ita & ego mitto vos, omnes Apostolos, non unum aliquem ex ipsis. Et Matth. 28. v. 19. Euntes docete omnes gentes: Nec ulli hac missio restricta, limitata aut distincta est. Donis etiam omnes pariter instruxit, effundendo super ipsos Spiritum S. Cum complerentur dies Pentecostes repleti sunt omnes Spiritu S. Act. 2. v. 1, 4. & cap. 4. v. 31. Quum orassent, motus est locus, in quo erant congregati, & repleti sunt omnes Spiritu S. & loquebantur verbum Dei cum fiducia. Quare ut Petrus accepit Spiritum S. sic & Jacobus & Andreas & reliqui similiter. Præterea Christus omnes ex aquo instruxit potestate remittendi & retinendi peccata. Joh. 20. v. 23. Quibus remisistis peccata remittuntur eis, & quorum retinueritis retenta sunt. Matth. 18. v. 18. Quæcunq; alligaveritis super terram erunt ligata & in coelo, & quæcunq; solveritis super terram, erunt soluta & in coelo. Quid hoc quasi differt ab eo, quod Petro dictum Matth. 16. v. 19. Tibi dabo claves regni coelorum & quodcunq; ligaveris super terram erit ligatum in coelis, & quodcunq; solveris super terram erit solutum in coelis? quid est clavis, nisi potestas? quid ligare & solvere, nisi retinere & remittere peccata? At hoc omnibus tributum vides sine discrimine. Forsan Petro primò datum est, quod postea cæteris; at aliud est claves illum primum accepisse, aliud solum.

XIII. Cyprianus equidem scriptor III. Seculi loca ista comparans inaequalitatem videre non potuit, quòd tamen Dominus ratione ordinis primum fecerit Petrum, in eo Ecclesia unitatem commendatam dicit lib. de Simplicitate Prælatorum seu de unitate Ecclesie in princip. Loquitur, inquit, Dominus ad Petrum: Tibi dabo claves regni coelorum &c. & eidem post resurrectionem suam dicit, pascere oves meas. Et quamvis Apostolis omnibus post resurrectionem suam pa-



am parem potestatem tribuat & dicat: sicut misit me Pater &c; tamen ut unitatem manifestaret, unitatis ejusdem originem ab uno incipientem sua auctoritate disposuit. Hocerant utiq; ceteri Apostoli, quod fuit Petrus, pari consortio præditi honoris & potestatis, sed exordium ab unitate proficiscitur, ut Ecclesia una monstretur. Minus adhuc Hieronymus ullam inaequalitatem hic animadvertere potuit, qui jam sub finem Seculi IV. floruit, lib. 1. adversus Jovinianum: At dicis, inquit, super Petrum fundatur Ecclesia; licet id ipsum in alio loco super omnes Apostolos fiat, & cuncti claves regni coelorum accipiant & ex æquo super eos Ecclesiae fortitudo solidetur.

XIV. Quod per claves nihil aliud intelligatur, quam potestas remittendi & retinendi peccata, unanimi consensu docent veteres, idq; ex ipsis verbis evidens est; attamen illud in presenti urgere super sedemus, sufficit ostendisse omnibus ex æquo hanc potestatem obuenisse; aut igitur omnes & singulierunt Ecclesia principes ac Domini, aut Dominatus quidam per clavium traditionem non infertur. Manifestum igitur quod in omnibus Apostoli inter se fuerint aequales; omnes eodem modo missi sunt, omnes eadem auctoritate docendi instructi sunt, eadem ad hoc munus dona acceperunt, ex æquo potestatem ligandi & solvendi habuerunt. Nec quicquam hic ad Apostolicum munus reliquum est, quod non aequaliter Dominus inter illos fuerit partitus: imò nihil est, ad supereminentem auctoritatem pertinens, quod Dominus ab ipsis non removerit. Nam cum primatus inter discipulos in questionem veniret: Reges gentium, inquit, dominantur eis, & qui potestatem habent super eos, benefici vocantur; vos autem non sic, sed qui major est inter vos, fiat sicut junior, & qui præcessor est, sicut minister. Luc. 22. v. 25, 26. Non supponitur quod aliquis sit major & præcessor, sed si quis esse velit, ne su-



perioiorem cæteris se faciat, monetur: Qui voluerit inter vos major fieri, sit vester minister, & qui voluerit inter vos primus esse, erit vester servus, ut hæc verba Matthæus c. 20. v. 26, 27. effert.

XV Sciendum, quod Christus hanc admonitionem instituerit, cum jam dudum Petro dixisset: Tibi dabo claves. Quod si igitur Petrus jam erat major, vel caput Ecclesiæ designatus, cur etiam ipse contendit cum cæteris, eodem ambitionis morbo correptus, quem Christus in cæteris sanare instituit? cur Christus & illum objurgat? cur non fatetur Dominus, se Petro tradidisse primatum, & qualis ille sit explicat? Et dic sodes: si Petrus jam fuit Monarcha Ecclesiæ designatus, quomodo Apostolitam obliuisci fuerunt, ut, Petro jam dominatum delatum, non meminerint? quomodo Jacobus & Johannestam audacter petierunt primas sedes apud Christum? cur indignati fuerunt decem? inter quos & Petrus fuit. Matth. 20. v. 24. Quod omnibus discipulis, inquit Cyrillus lib. 20. Thesauri c. 5. quasi pro mercede benevolentiae erga Christum erat propositum (Matth. 19. v. 28.) soli rapere studuerunt. Verum ne inanis gloriæ cupiditate victi viderentur, ipsi quidem pudore silent; matris verò ministerio utuntur. — Apertè igitur per hæc verba videtur mulier id, quod omnibus debebatur, ad filios solummodo suos velle traducere. Nam nisi hoc esset, qua ratione, quod datum erat omnibus discipulis, de numero quorum etiam filij ejus fuerunt, id ipsa rursus petit? non aliā videlicet, nisi ut commune omnium præmium ad suos transferret. Molestè tulisse cæteri discipuli scribuntur, quoniam propositum omnibus honorem petitione mulieris rapi videbant, & certè quantum ad ipsam & ad filios suos fuerat, ereptus hic honor cæteris fuisset. Salvator a. universaliter, ne Zebedæi filios turbaret ad doctrinam ipsorum & omnium dixit; Gentium reges &c.

Nihil



XVI. Nihil igitur est, quod Apostolos in cura super Ecclesiam inaequales facere possit, neq. praxis eorum aliud docet. Semper enim communi opera & pari autoritate demandatum munus exequuntur. Sic duodecim convocantes totam multitudinem discipulorum, constituerunt septem diaconos. Act. 6. v. 2. Si Petrus cæteris omnibus fuit superior & caput Ecclesiæ, cur non seorsim ejus sit mentio? cur omnibus Apostolis tribuitur, quod solius Petri esse adversarij dicunt? Scilicet Petrus Collegio Apostolico inferior fuit, quod & potestatem eum mittendi habuit, sicut dicitur Act. 8. v. 14. Quum audivissent Apostoli, qui erant Hierosolymis, quod accepisset Samaria verbum, miserunt ad eos Petrũ & Johannẽ. Nũ caput mittitur à membris? princeps à subditis? Minor enim majorẽ propriè nunquã mittit, sed major inferiorem, vel certè ad minimũ par parem. Cum quaestio gravissima de Circumcisione suboriretur in Ecclesia Pãulus & Barnabas statuerunt ascendere ad Apostolos & Presbyteros in Jerusalem super hac quaestione. Act. 15. v. 2. Cur ad Apostolos & Presbyteros, & non ad Petrum, si ille caput Ecclesiæ, & unicus Christi in terris vicarius fuit? Num in Monarchia res magni momenti totum regnum concernentes ad multos deferri solent? Tot in collegio hic omnis potestas, totumq. negotium tribuitur. Quum venissent Hierosolymam suscepti sunt ab Ecclesia & ab Apostolis & senioribus. v. 4. Ad Apostolos ierunt, Apostoliceos susceperunt. At forsã Petrus cæteros convocavit: Nihil minus; convenerunt Apostoli & seniores seu presbyteri videre de verbo hoc. v. 6. Et quamvis Petrus tanquam senior primus dixerit sententiam, quã & ulterius explicavit & confirmavit Jacobus, decretum tamen Synodale ex aequo omniũ Apostolorũ est: Placuit Apostolicum cum omni Ecclesia eligere viros. v. 22. Epistola synodalis, in qua maxime primatum Petri elucere par erat, sic insit: Apostoli & seniores & fratres his qui sunt Antiochiæ & Sy-



riæ & Ciliciæ fratribus ex gentibus, salutem. v. 23. Visum est Spiritus & nobis nihil ultra vobis imponere oneris v. 28. Num hac statum Monarchicum præseferunt, nec potius manifestam Aristocratiam, ubi toties sine omni exceptione, regimen Ecclesiæ optimatibus ex æquo tribuitur, sine ullo inæqualitatis indicio?

XVII. Paulus adeò non cedit Petro aut ulli Apostolorum, ut se nihilo minorem dicat ijs qui sunt ὡς ἀπὸ τοῦ 2. Cor. II. v. 5. cap. 12. v. 11. Petrus verò adeò non est caput & fundamentum Ecclesiæ & Apostolorum, ut statim initio crescentis Ecclesiæ graviter lapsus ab novissimo Apostolorum correctus & in viam reductus fuerit. Quum venisset Petrus Antiochiam in faciem ei restiti, ait Paulus, quia reprehensione dignus erat. Gal. 2. v. 11. Quum vidissem, quod non rectè ambularet ad veritatem Evangelij, dixi Cephæ coram omnibus: Si tu cum Judæus sis, gentilium more vivis, non Judæicè, quomodo gentes cogis judaizare? v. 14. Verum hanc non ex pacto simulatam, ut voluit Hieronymus, reprehensionem fuisse, cum Cypriano, Augustino & alijs, admittit etiam Bellarminus lib. 1. de Rom. Pont. c. 16. Quod si igitur reprehensio Pauli vera, justa & legitima est, sequitur Petrum verè errasse, si ve in vita, si ve in doctrina; sanè non rectè ambulare ad veritatem Evangelij & cogere gentes judaizare videtur omninò errorem in doctrina inferre, si quidem hoc est articulum de libertate Christiana convellere, vel in dubium vocare. Hoc igitur fecit Petrus, si non directè, tamen indirectè & consequenter, quod gentiles ex ipsius conversatione & simulatione talem opinionem conciperent. Unde August. lib. 7. de Bapt. contra Donatistas cap. 1. dicit, Petrum contra veritatis regulam, quam postea Ecclesiæ tenuit cōgisse gentes judaizare.

XVIII. Hiccinè est Ecclesiæ caput & fundamentum? hiccinè est Petra, super quam fundata est Ecclesiæ, qui sine omni errore erran-



errantes corrigere & fratres confirmare potest? Hiccinne est caput  
& princeps Apostolorum, qui tam vehementer coram tota Eccle-  
sia increpari potuit? Confectus igitur est iste primatus, nec ullum  
pro Monarchia Petri, aut inaequalitate Apostolorum in officio  
Apostolico, in Scripturis & puriori antiquitate est vestigium.  
Nihilominus tam rigidi non sumus, quin Petro quasdam persona-  
les prerogativas praeter ceteris Apostolis concedamus: Fuit enim se-  
nior ceteris, ut dicit Hieronymus lib. 1. advers. Jovin. & primus  
omnium vocatus Christo adhesit. Matth. 4. v. 18, tū etiam con-  
fidentia & ardore charitatis majore prae datus reperitur, quam  
reliqui. Joh. 21. v. 15. In omnibus locis inquit Hieronymus l.  
2. in Matth. cap. 14. ardentissimae fidei invenitur Petrus.  
Et Cyrillus lib. 16. in Joh. cap. 64. Praeveniebat, inquit, alios  
Petrus: ardore namque Christi praecipuo fervens, & ad  
faciendum & ad respondendum paratissimus erat. Ha  
personales prerogativae; quae certè in nullum successorem transire  
possunt, fecerunt, ut Petrus praeter ceteris honoratior videretur; &  
hinc Patres eum tam splendidis ornant titulis, ut appellent caput  
principem, praecipuum, verticem Apostolorum.

XIX. Jam quicquid Apostoli potestatis ordinaria ad regen-  
dam Ecclesiam necessaria acceperunt, id totum in Episcopos &  
Presbyteros ab se ordinatos transmiserunt virtute illorum ver-  
borum Joh. 20. v. 21. Sicut misit me Pater ita & ego mitto  
vos. Proprium autem munus Apostolorum fuit, ipsos tanquam  
testes oculatos ab ipsomet Christo immediatè missos primum pra-  
dicare Evangelium in toto orbe, & fundare Catholicam Ecclesi-  
am, quo respectu successores habere non possunt: Neque enim tale  
quid Ecclesiae semper necessarium est: Sed potestas docendi, admi-  
nistrandi Sacramenta, dispensandi claves, mittendi alios Pastores  
in ipsis erat ordinaria & semper necessaria Ecclesiae, eamque Apo-  
stoli in toto orbe exercere poterant, attamen actu non nisi in par-  
ticulari Ecclesia exercuerunt; atque sic habitu quasi fuerunt uni-  
versa-



versales Ecclesiæ per totum orbem Episcopi, at ætæ & exercitio tantum in eo loco, ubi pro tempore versabantur, in quo pedetentim sibi successores designabant, quod universalibus doctores seu Episcopis in Ecclesiâ plantata non amplius esset opus. Sic Paulus Ephesi constituit Episcopum Timotheum, 1. Tim. 1. v. 3. & Titum Creta. Tit. 1. v. 5.

XX. Hinc sæpius apud Patres Episcopi dicuntur Apostolorum successores, sic tamen ut ipsi Apostoli inter Episcopos alicujus loci spectati sic dictos non numerentur, quia non uni alicui, sed multis succedebatur, & quia Apostoli nullibi fixam sedem habebant. Ignatius Epist. l. 12. Evodium primum post Apostolos Antiochena Ecclesiâ gubernacula sortitum esse scribit, sicut & Eusebius l. 3. c. 16. dicit, Evodium primum Antiochiæ Episcopum fuisse, secundum Ignatium. Irenæus lib. 3. c. 3. Polycarpus, inquit, ab Apostolis in Asia in ea, quæ est Smyrnis, Ecclesiâ constitutus Episcopus, quem & nos vidimus in prima nostra ætate, docuit. Et Tertullianus lib. de præscript. Edant, ait, origines Ecclesiarum suarum, evolvant ordines Episcoporum suorum ita per successiones ab initio decurrentes, ut primus ille Episcopus aliquem ex Apostolis, vel Apostolicis viris, qui tamen cum Apostolis perseveraverit habuerit autorem & antecessorem. Hoc enim modo Ecclesiæ Apostolicæ census suos deferunt: sicut Smyrnæorum Ecclesiâ habens Polycarpum ab Johanne collocatum, refert: sicut Romanorum Clementem à Petro ordinatum: Proinde & cæteræ exhibent, quos ab Apostolis in Episcopatum constitutos, Apostolici seminis traduces habeant.

XXI. Romanam Ecclesiam Petrum & Paulum fundasse veteres ferè communiter testantur, sed ita, ut itidem eos tanquam Apostolos in serie Episcoporum demptos velint. Irenæus lib. 3. c. 3. Fundantes igitur, inquit, & instructes beati Apostoli Eccle-



Ecclesiam Lino Episcopatum administrandæ Ecclesiæ tradiderunt, succedit Anacletus, post eum Clemens. Idem habet Euseb. l. 5. c. 6. qui & lib. 4. c. 1. Alexander, inquit, quintus, successione à Petro & Paulo ducta, Pontificatum obtinet. Et Epiphanius Hæresi 27. Romæ, inquit, fuerunt primus Petrus & Paulus Apostoli iidem ac Episcopi, deinde Linus, deinde Clemens. Neq. verò solus Petrus Romæ docuit, sed & Paulus, & plus forsàn ibi laboravit, quam Petrus, quod equidem ex Actis & Epistolis Paulinis manifestum est, ubi plurima Pauli, nulla Petri Romæ peracta opera describitur. Dionysius Corinthius apud Eusebium l. 2. c. 25. scribens ad Romanos: Petrum & Paulum, inquit, qui Romanos & Corinthios primum in Ecclesiam Christi inferuerunt, in suum locum conclusistis. Tertullianus lib. de præscript. advers. Hæreticos c. 24. tres fundatores hujus Ecclesiæ nominat: Felix Ecclesia, inquit, ubi totam doctrinam Apostoli cū sanguine suo profuderunt, ubi Petrus Passionis Dominicæ adæquatur, ubi Paulus Johannis exitu coronatur, ubi Apostolus Iohannes, postquam in oleū igneum demersus nihil passus est, in insulam relegatur.

XXII. Præterea ubicunq. Apostoli docuerunt & Ecclesias fundarunt, ibi quasi cathedram suam collocarunt, in qua sequentiū temporū doctores & Episcopi successerunt. Tertullianus lib. de Præscript. advers. Hæret. c. 14. Age jam, inquit, qui voles curiositatem melius exercere in negotio salutis tuæ, percurre Ecclesias Apostolicas, apud quas ipsæ adhuc cathedræ Apostolorum suis locis præsidentur, apud quas ipsæ authenticæ literæ eorum recitantur sonantes vocem & representantes faciem uniuscujusq. Proxima est tibi Achaia? habes Corinthum, si non longè es à Macedonia, habes Philippos, habes Thessalonicenses. Si potes in Asiam tendere, habes Ephesum, si



autem Italiae adjaces habes Romam, unde nobis quoque  
autoritas præstò est. Hieronimus quoque Epist. 38. ad Dama-  
sum & Marcellam: Prædicatione quoque, inquit, cathe-  
dræ Marci Evangelistæ, cathedra Petri Apostoli sua  
prædicatione confirmet.

XXIII. Ex quibus omnibus manifestum est, quod Petrus Ro-  
ma non solum, sed & Antiochia & alijs in locis suam cathedram  
habuerit, quod & Pauli, & fortè etiam Johannis Evangelistæ  
cathedra ibi constituta fuerit, quod Episcopus Romanus, non ma-  
gis succedat Petro, quam Paulo & Johanni, quod non minus E-  
piscopus Hierosolymitanus & Antiochenus & Corinthius sede-  
rint in cathedra Apostolica, quàm Episcopus Romanus; summa-  
tim quod Episcopus Romanus non sit specialis Petri successor, nec  
Romana Ecclesia ex prædicatione & cathedra Petri singularem  
quandam præ reliquis excellentiam acceperit, nedum in reliquas  
Ecclesias dominatum. Quin potius ut Apostoli in forma Aristo-  
cratia Ecclesiam gubernarunt; sic & successores eorum Episcopi  
eandem formam, quam diligentissimè in regimine Ecclesiastico  
conservarunt, dignitas seu prærogativa uni præ altero non nisi ra-  
tione urbium vel sedium digniorum tributa fuit.

XXIV. Initio Seculi II. suboriebatur controversia de Paschate  
celebrando, cum adhuc Polycarpus Smyrnæorum, Anicetus Ro-  
manorum esset Episcopus. Et sanè ille Romam profectus Anicetum  
non ut caput & principem suspexit, sed cum eo ut pari conversatus  
est, quod patet ex verbis Irenæi apud Euseb. l. 5. c. 23. Quum bea-  
tus Polycarpus Romæ sub Aniceto ageret, ac propter  
alia minuta quædã inter se discrepassent, mox concilia-  
ti sunt, de hoc verò capite nihil inter se contenderunt.  
Neque enim Anicetus Polycarpo suadere poterat, ne  
servaret, quæ cum Johanne discipulo Domini nostri  
ac reliquis Apostolis quibuscum fuerat conversatus,  
semper servaverat; nec Polycarpus Aniceto suasit ut ser-



fervaret. Accrevit verò controversia sub finem seculi, cum Victor Episcopalem sedem Roma occuparet & Ecclesias à se dissentientes à communione amputare conaretur. Quod tamen illa non solum nullius estimarunt, sed & vehementer in eum tanquã turbatorem Ecclesia invec̃ta sunt. Extant verba illorum ait Eusebius l. c. qui Victorem acriter reprehenderunt, è quibus & Irenæus nomine fratrum per Galliam, quibus præerat, scripsit. Polycrates quoq; tunc Ephesiorum Episcopus apud Eusebium l. d. se nihil turbari, ait, illis, quæ terrendi gratiã obiciuntur: Etenim, inquit, majores mei Deo magis, quam hominibus obediendum esse dixerunt. Numquid hoc Monarchiam sapit & primatum Romani Episcopi, quod ipsius definitione non acquiescunt, edictum contemnunt, fulmen susq; deq; habent, quin acerrimè ipsum insectantur, reprehendunt, corrigunt?

XXV. Seculo III. Cryprianus Cathaginensis Episcopus & martyr, singulare Ecclesia lumen, se Episcopo Romano nihilo inferiore facit: Non solum enim Cornelium, Stephanum, Lucium, ad quos plurimas scripsit Epistolas, subinde fratres & collegas vocat, sed & ipsum Cornelium ob susceptum Fœlicissimum & Fortunatum aliosq; Clericos ex Ecclesia ejectos, acerbis insectatur verbis l. 1. Epist. 3. ad Cornelium, quod aliena judicia ad se traheret, quod Episcoporum alienorum jurisdictionem usurparet; quod impediret, ne Ecclesia à suis Episcopis liberè regerentur. Pariter invchitur in Stephanum, in controversia de rebaptizandis Hæreticis inter Africanos & Romanum Episcopum agitata: Sic enim scribit ad Pompejum Epist. 74. Edit. Pamel. Desiderasti in notitiã tuam perferri quæ mihi ad literas nostras Stephanus frater noster rescripserit: nisi tibi rescripti ejus exemplum, quò lectò magis & magis ejus errorem devitabis, qui hæreticorum causam contra Christianos & contra Ecclesiam Dei asserere conatur Nam inter cætera vel



superba vel ad rem non pertinentia, vel sibi ipsi contraria, quæ imperitè atq; improvidè scripsit, etiam illud adjunxit &c. *Quis credat Cyprianum de capite & monarcha Ecclesia ita scripturum, qui singularis est ordinis Ecclesiastici adsertor?*

XXVI. Firmilianus quoq; Cappadocia Episcopus in eadē causa ad Cyprianum scripsit, multo acerbioribus verbis Stephano insultans Epist. 65. apud Cyprianum, ubi, cum ei inscitia, discordiarum & Schismatis notam inusisset, subjicit: Hoc est servasse unitatem Spiritus in conjunctione pacis, abscindere se à charitatis unitate, & alienum se per omnia fratribus facere, & citra Sacramentum & fidem contumacis furore discordiæ rebellare. Apud talem potest esse unum corpus & unus Spiritus, apud quem fortasse ipsa anima una non est, sic lubrica & mobilis & incerta. Hæcine in vicarium Christi & caput universalis Ecclesia quadrant? Ideò manifestum est, quòd his temporibus papatus Romanus mundo fuerit ignotus.

XXVII. Seculo IV. in Concilio Niceno demum id, quòd hætenus consuetudine introductum erat, ut ab urbibus Episcoporum dignitas æstimaretur, & Metropolitanicateros anteirent, decretis confirmatum est: Sic enim habet Can. 6. in communi lectione ex Græco: Antiqui mores, qui sunt in Ægypto, Lybia & Pentapoli obtineant, ut Alexandrinus Episcopus horum omnium habeat potestatem: quoniam & Romæ Episcopo hoc est consuetum. Similiter autem & in alijs provinciis privilegia servantur Ecclesijs. Ubi tametsi Synodus non primum constituit limites Ecclesijs Patriarchalibus, eos tamen consuetudine jam constitutos firmat ac fulcit, prævrens, ne qua suos terminos excedat, sive Alexandrina, sive Romana fuerit: Nam & hanc suos proprios limites habere, ex eadem consuetudine statutos, innuit. Neg. glossa Bellarmini lib. 2. de Pontifice



tif. c. 13. quia Romanus Episcopus consuevit permittere Episcopo Alexandrino regimen Ægypti, Lybia & Pentapolis, quicquam valet: Non enim de permissione sermo est, sed jure & privilegijs sedium Patriarchalium, cui ob comparisonem etiam Romana sedes annumeratur. Igitur Ecclesia Romana tunc in œcumenico Concilio habita fuit particularis, una ex Patriarchalibus sedibus, non supra sedes Patriarchales constituta, sicut jam dominium sibi arrogat.

XXVIII. Quod ipsum & Athanasius, qui Concilio interfuit, & de Monarchia Ecclesie nihil quicquam novit nobis exponere potest in Epist. ad solitariam vitam agentes Tom. 2. Ne Liberio quidem, inquit, Romano Episcopo pepercerunt, nullā reverentiā ducti vel quòd sedes illa esset Apostolica, vel quòd Roma metropolis esset Romanæ ditionis, vel quòd eos viros Apostolicos in suis literis appellassent. Cur non dixit, quòd Liberius caput universalis Ecclesie, & Christi in terris vicarius esset? Idem in primis conveniens fuisset, dum quantum potest, ejus dignitatem exaggerat. Postea cum una cum Paulo Constantinopolitano sede ejiceretur à Constantio Imperatore, Romam fugit ad Julium tunc temporis Romanum Episcopum, non quòd cum caput Ecclesie aestimaret, sed quòd uni Patriarche, reliquos monere ex officio incumberet, & quòd in primis Romanus apud Imperatorē in occidente aliquid valeret. At verò cum Julius imperare Episcopis in oriente conaretur, tantum absuit, ut parerent, ut potiùs quantum fieri potuit, conatibus & mandatis ejus obsisterent.

XXIX. Hac de re Socrates lib. 2. c. 11. sic loquitur: Eodem tempore Paulus Episcopus Constantinopolis, Asclepas Gazæ, Marcellus Ancyrae urbis minoris Galatiæ, & Lucius Hadrianopolis, alius ob aliam causam accusati & Ecclesiis suis ejecti Romæ omnium civitatum facile principi versantes, Julium Episcopum Romanum de



suo ipsorum statu certiores faciunt. Ille verò quoniam Ecclesia Romana privilegium præter cæteras obtinebat, literis suis ad Episcopos orientis liberius perscriptis, illorum partes studet tueri. In orientem literas mittit, quo & suis cuiq; locus restitueretur, & eos, qui illos temerè abdicaverant, graviter reprehenderet. Illi decedunt Romam literisq; Episcopi Iulij confisi ad suas ipsorum Ecclesias redeunt: literas, ad quos scriptæ erant, mittunt. Hi ubi eas acceperunt, Iulij reprehensionem contumeliæ loco ducunt. Concilium Antiochiæ convocant. Ibi simul atq; convenerant, de comuni omnium sententia, Epistolam conscribunt, per quam Iulium contra acrius insimulant, ostenduntq; si quæ eorum arbitrio Ecclesia fortè exacti essent, rem ab eo non debere decerni. Nam quando ille Novatum Ecclesia exturbarat ipsos minimè contradixisse: Ista Episcopi orientis Julio Episcopo Romano per literas significarunt. *Idem pluribus describit Sozomenus l. 3. c. 7.*

XXX. In occidente Hieronymus quoq; summam aequalitatem Episcoporum his asserit verbis. *Epist. ad. Evagriū* Nec altera, inquit. Romanæ urbis Ecclesia, altera totius orbis existimanda est. Et Gallia & Britannia & Africa & Persis. & Oriens & India & omnes barbaræ nationes, unum Christum adorant, unam observant regulam veritatis. Si auctoritas quæritur, orbis major est urbe. Ubi cunq; fuerit Episcopus, sive Romæ, sive Eugubij, sive Constantino-  
poli sive Rhegij, sive Alexandriæ sive Tanis, ejusdem meriti ejusdem est & sacerdotij. *Sic ille Romanum Episcopum cæteris adequat, qui alias tanti estimavit Damasum. Ideo tunc temporis nihil dum de œcumenico Pontifice in Græca & Latina Ecclesia fuit creditum.*

XXXI. Seculo V. Augustinus Hipponensis in Africa Episcopus,  
2012



non solum ejusdem potestatis Ecclesiam Africanam & Romanam facit, comparans Stephanum & Cyprianum lib. de unico Baptismo contra Petilianum c. 14. Tom. 7. Sed & cum Africana Ecclesia papatui Romano vehementer restitit in Carthaginensi Synodo VI. Titillabat Episcopos Romanos, quod passim in alijs Ecclesijs accusati Romam refugium caperent, inde se pedetentim efferre supra ceteros Episcopos caeperunt, & precise recipi ab omnibus voluerunt, quos ipsi juberent. Ideo Africani convenientes ejusmodi Canonem fecerunt, qui est in Synodo sub Bonifacio & Caelestino LXXII. Quicumq; non communicant in Africa, si in transmarinis ad communicandum obrepserint, jacturam Clericatus excipiant. Hic Canon, cum praecipue respiceret Romanam Ecclesiam, procul dubio movit Zosimam Episcopum Romanum, praesertim cum Apiarius Presbyter Ecclesia Siccensis, homo multis sceleribus insignis, ab Africanis ejectus Romam fugeret, ut in Africa legatione destinaret, admonens Episcopos, ut Apiarium reciperent & canones Nicenos observarent, in quibus statutum esset, licere accusatis ad sedem Apostolicam Romanam appellare. Convenerunt ducenti septendecim Episcopi, inter alios Augustinus, Prosper, Orosius & multi alij praestantes viri & responderunt Bonifacio, qui Zosimo successerat, se canones Nicenos servaturos, modo scirent, esse genuinos. Interim Constantinopolin & Alexandriam scripserunt, petentes a Patriarchis exemplaria canonum Nicenorum incorrupta, quae cum accepissent & canones Zosimi supposititios deprehendissent, ad Caelestinum Pontificem Zosimi successorem acres dederunt literas.

XXXII. Illa in Synodo Africana sub Bonifacio & Caelestino cap. 105. Tom. 1. Concil. sic habent: Deprecamur, ut deinceps ad vestras aures hinc venientes non facilius admittatis, nec a nobis excommunicatos in communionem ultra velitis recipere: quia hoc etiam Niceno Concilio definitum, facile advertit venerabilitas tua. Nam etsi de  
inferi-



inferioribus Clericis, vel laïcis videtur tibi præcavere, quanto magis de Episcopis voluit hoc observari, ne in sua provincia communione suspensi à tua sanctitate vel festinato, vel præproperè, vel indebitè videantur communioni restitui — Decreta Nicena sive inferioris gradus Clericos, sive ipsos Episcopos suis Metropolitanis apertissimè commiserunt. Prudentissimè enim justissimeq; providerunt, quæcunq; negotia in suis locis, ubi orta sunt, finienda; nec unicuiq; provinciæ gratiam sancti Spiritus defuturam, quæ æquitas à Christi sacerdotibus & prudenter videatur & constantissimè teneatur. Maxime quia unicuiq; concessum est, si iudicio offensus fuerit cognitorum ad Concilium suæ provinciæ, vel etiam universale provocare. Nisi fortè quisquam sit, qui credat, uni alicui posse Deum nostrum examinis inspirare justitiam, & innumerabilibus congregatis Concilio denegare — Ut aliqui à tuæ sanctitatis latere mittantur, nullum invenimus patrum Synodo constitutum. Quin illud quod pridem per eundem coëpiscopum nostrum Faustinum tanquam ex parte Niceni Concilij ex fide transmisistis, in Concilijs verioribus, quæ accipiuntur Nicena, tale quid non potuimus reperire. Executores etiam Clericos vestros quibusq; petentibus nolite mittere; nolite concedere, ne fumosum typhum seculi in Ecclesiam Christi, quæ lucem simplicitatis, & humilitatis diem, Deum videre cupientibus præfert, videamur inducere.

XXXIII. Huic Concilio & interfuit & subscripsit Augustinus, in quo certè non ex illo, Tu es Petrus, Pasce oves meas, disputatum est de primatu & potestate Romani præsulis, sed ex decretis Conciliorum, ex quibus tamen tunc temporis tot sancti viri congregati, nondum cognoscere potuerunt potestatem Romana Ecclesiæ super alias; quin potius Episcopum ejus & decretis Nicenæ Synodi & cuius alij Concilio œcumenico subiectum esse, existimârunt, eumq; graviter monuerunt ne typhum seculi, Jurisdictionem politicam in Ecclesiam inducere & in alios sibi arrogare conaretur. Quomodo hoc cum visibili Monarchia Ecclesiæ consistere possit, viderint adversarij, nos videre non possumus. Et proinde cum primatus Papa universali Ecclesiæ in primis quinq; seculis ignotus sit, nos eum cū cæteris abusibus & erroribus pedetentim invecitum, & ad hanc formam, quam modò conspiciamus, redactum, merito reformatum & abolvendum pronunciamus.















